

KONTROL MOZIOA

EH Bildu udal taldeko zinegotzi Zigor Etxeburua Urbizuk, Udaltzaren Organo Araudiko 98. artikulua oinarri hartuta, mozio hau aurkezten du Udaltzaren azter dadin. Mozioa, 2023ko urtarrilaren 16an, Gune Publikoen Batzordean aztertutako interpelazioaren ondorioa da.

JUSTIFIKAZIOA

Abenduaren 14an, DonostiaTIK erakundeko Artezkaritza Kontseiluan erabakigai izan genuen Udalarentzako bideozaintza azpiegiturak hornitzeko, eta horiek mantentzeko eta abian jartzeko zerbitzuak kontratatzea. Kamera zaharren ordez teknologia berria duten kamerak jarriko dira, baita Adimen Artifizialdun (AA) funtzionalitate berriak izango dituzten grabagailuak eta sistema zentralak ere; horien bidez, besteren artean, bideokamerek jasotako irudien analitika adimenduna egingo da:

- Bereizmen eta kalitate handiko IP kamera erosiko dira, edozein meteorologia eta argiztapen egoeratan (gauzez eta egunez) koloretako irudien grabazio jarraitua lortzeko; gainera, kanporako bezala, udal eraikin barruetarako ere hartuko dira. Era berean, operatibo berezietarako (Aste Nagusia, estropadak, Santomas, kirol ekitaldi handiak...) aire zabaleko bideozaintza zerbitzua ere kontratuaren parte izango da (kamera profesionaleko 2 unitatetik 8ra bitarte) eta horiek ere autoikaskuntzako bideo analitika egiteko gaitasuna izango dute.
- Bideozaintza kontrol zentroan hiru hilabetez gorde ahalko dira grabazioak, eta edozein grabaziotan bilaketak egiteko gai izango da sistema: forentse mailakoak, pertsonen eta ibilgailuen sailkapenarekin; AAn oinarritutakoak (pertsona eta ibilgailu zehatzak bilatzea deskribapen fisikoaren arabera, edota portaera anomaloak automatikoki detektatzea) eta Antzemate Fazialaren bidezko bilaketak (udaletxeko korridoretako eta Anoetako kamerak).
- Lizitazio prezioa, guztira, 358.393,19 €koa izango da, eta NEXT funtsen laguntza izango du. Europako Batasunak ezarritako epe estuek eragin dute izapideak arindu behar izatea.

Arrazoibideen txostenean irakur daitekeenez, *“Segurtasuna gure gizartearen oinarrietako bat da. Balio juridikoa izateaz gain, askatasunaren eta berdintasunaren oinarrian dago, eta gizabanakoen erabateko garapenean laguntzen du. Ikuspegi horretan, Donostiako Udalaren bideozaintzako azpiegituren pixkanakako berrikuntza integratua eta zentralizatua balizko arrisku edo delituei aurrea hartzeko eta zaintzeko neurri gisa eratzen da. Era berean, erabiltzaileen segurtasun- edo informazio-premia legitimoak ase nahi dira, pertsonen edo ondasunen ukigabetasuna eta pribatutasuna zainduz, eskubideen balizko urraketan, nahita egindako mehatxuen eta ustekabeko edo naturatik eratorritako arriskuen aurrean. Horrela, segurtasun publikoa bermatzen, arau-hausteak prebenitzen eta bere jarduketa eta ikerketekin lotutako prozedurei informazioa ematen lagundu nahi da”*.

EH Bildu talde politikoa

Grupo político EH Bildu

Ijentea, 1 - 20003 Donostia
Tel. 943481027 eh_bildu@donostia.eus-- www.donostia.ehbildu.eus

Aitzitik, ez plegu teknikoetan, ez Arrazoitzeko txostenean, ez zaio aipamenik egiten pertsona fisikoen oinarrizko eskubideak eta askatasunak babestu beharrari, ezta intimitaterako eskubidea zaindu beharrari ere. Kontuan izatekoa da Europar Batasunak horiek bermatzeko eskatzen diela kide diren estatuetakoa erakundeei. Hain zuzen ere, irizpide eta betekizun horiek jasota ageri dira pertsona fisikoen datu pertsonalen tratamenduari eta babesari buruzko Europar Batasunaren 2016/679 Erregelamenduan, baita estatuko 3/2018 Lege Organikoan ere. Gainera, Datuak Babesteko Europako Batzordeak (DBEB) jarraibide sorta bat emana du bidezaintza ekipamenduak erabiltzen dituzten Europar Batasuneko erakunde eta organismoei Erregelamendua nola bete eta bidezaintza arduraz nola erabili aholkatzeko, eta, aldi berean, berme eraginkorrak ezartzeko. Horien guztien inguruan, ordea, ez du aipamenik egiten DonostiaTIK erakundeak lizitatzekoa duen kontratuan.

Hartzeko genuen erabakiaren garrantziaz jakitun, segurtasun sistema horren kudeaketaren inguruko hainbat galdera egin genituen Artezkaritza Kontseiluan, baina erantzun zehatzik ez genuen jaso: irizpideak Udaltzaingoko zuzendaritzak eman dituela besterik ez. Horiek horrela, udal batzordean hainbat galdera zehatz egin genizkion alkateari, eta kargu hartu genion hain erabaki garrantzitsua korrika eta presaka, gogoeta sakonagorik egin gabe eta gaia aztertzeko lan saio bat ere deitu gabe hartzeagatik. Gainera, galdetu genion zergatik ez duen mahai politiko eta teknikorik eratu bidezaintza plataformak herritarren eta udal langileen oinarrizko eskubideetan eta intimitaterako eskubidean izan ditzakeen eraginak jorratzeko.

Udal Gobernuak erantzun zuen erabaki honekin ez dela presaka aritu, baina ez dira egin legeek eskatutako aurrelanak, ondoren zehaztuko dugun bezala, eta Arrazoizko txostenak ere argi adierazten du premiazko prozedura erabili dela tramitazioan.

Bestalde, Segurtasuneko zinegotzi ordezkariak adierazi zuen Arau hauste penalak prebenitu, detektatu, ikertu eta epaitzeko eta zehapen penalak betearazteko tratatzen diren datu pertsonalak babesteko 7/2021 Lege Organikoaren arabera hartu direla bidezaintza plataformaren ingurukoak, eta ez dela norbanakoaren ohorearen aurkakotzat hartzen irudi horiekin segurtasun indarrek egin dezaketen erabilera. Edonola, zinegotzi ordezkariak ez zuen aipatu lege horrek berak agintzen duela, 16. artikuluan, batetik, bide edo leku publikoetan bideo kamera finkoak jartzen direnean, tratamenduaren arduradunak proportzionaltasun printzipioaren balorazioa egin beharko duela, egokitasunaren eta gutxieneko esku hartzearen alderdietatik; eta bestetik, EH Bilduk gogorarazi bezala, egin nahi den tratamenduari buruzko arriskuen azterketa edo datuen babeserako eraginaren ebaluazioa egin beharko duela, herritarrentzat sor daitekeen kalte mailaren eta lortu nahi den helburuaren arabera. Aitzitik, DonostiaTIK erakundearen gainean utzi nahi izan zuen horren ardura, tratamenduaren arduraduna Udaltzaingoko komisariorde bat izango dela aipatu bazuen ere.

EH Bildu talde politikoa

Grupo político EH Bildu

Ijentea, 1 - 20003 Donostia
Tel. 943481027 eh_bildu@donostia.eus-- www.donostia.ehbildu.eus

Gainera, aurkaratzeko herritarrek duten eskubidea gauzatzeko moduz galdetu zuen EH Bilduk, baina zinegotzi ordezkariak erantzun zuen poliziak ez duela horretarako beharkizunik. Horren aurrean, gogorarazi behar dugu 7/2021 Lege Organikoaren 23. artikulua aurkaratzeko herritarrek duten eskubidea bermatzen duela, eta aukera hori murriztekotan (24. artikulua) tratamenduaren arduradunak idatziz jakinarazi beharko diola interesdunari, atzerapen bidegaberik gabe, eta, nolahi ere, murrizketa horren berri izan eta hilabeteko epean, murrizketaren arrazoiak zein diren eta datuak babesteko agintaritzari erreklamazioa aurkezteko aukerak zein diren; hori guztia aipatzea ere ahaztu zuen.

Horrekin lotuta, EH Bilduk galdetu zuen nola bermatuko duen Udal Gobernuak udal langileen oinarrizko eskubide eta askatasunen babesa, bereziki intimitaterako eskubidearena, jakinik udal eraikinetan ere jarriko direla kamerak. Zinegotzi ordezkariak erantzun zuen panelen bidez adieraziko dela kamerak jarrita daudela, baina kontuan izan behar da 3/2018 Lege Organikoaren 89. artikuluan agintzen duela enplegatzaileek irudien tratamenduaren berri eman beharko diela alde aurretik, argi eta zehatz, langile publikoei eta, hala badagokio, haien ordezkarietara.

Era berean, galdetu genuen bideozaintza sistemak datu baserik edo algoritmorik sortuko duen, jakinik pertsona zehatzak deskribapen fisikoaren arabera bilatzeko, bereizteko eta sailkatzeko gaitasuna izango duela, eta Europar Batasunaren 2016/679 Erregelamenduaren 9. artikulua argiki debekatzen duela datu pertsonalak kategoriatan bereizien arabera tratatzea. Zinegotziak erantzun zuen ez zela horrelakorik sortuko, eta datuak eskuz tratatuko direla. Alde horretatik ere, EH Bilduren galderari erantzunez, zinegotziak adierazi zuen txertatu dela genero ikuspegia segurtasuneko bideozaintza plataforman, kameraren kokapenak kontuan izan baitu hiriko gune kritikoaren mapa.

Azkenik, EH Bilduk galdetu zuen irudiak zenbat denboraz gordeko diren, plegu teknikoek hiru hilabeteko epea aipatzen baitute, baina 3/2018 Lege Organikoaren 22. artikulua hilabeteko muga jartzen baitu; zinegotziak ez zuen argitxerik izan. Era berean galdetu genuen zer aldatu den hiriko egoeran hain gaitasun aurreratuak dituen bideozaintza sistema ezartzeko, jakinik 2011tik gaur arte jarrita egon diren kamerekin trafikoa zaintzeko eginkizuna besterik ez dutela izan, eta mugakizun hori horrela jasota ageri dela Alkatetzaren 2011ko apirilko ebazpenean. Zinegotziak azaldu zuen segurtasun ezaren sententzia gero eta handiagoa dagoela herritarren artean.

Horiek horrela, honako hau da behean sinatzen duen zinegotziak aurkeztutako KONTROL MOZIOA:

KONTROL MOZIOA

1. Donostiako Udaltzaren hertsatuki eskatzen dio Udal Gobernuari egin dezala, bideozaintzako irudien tratamendua dela eta, 7/2021 Lege Organikoaren 16. artikulua agindu bezala, batetik, proportzionaltasun printzipioaren balorazioa, egokitasunaren eta gutxieneko esku hartzearen alderdiak kontuan izanik; eta bestetik, egin nahi den tratamenduari buruzko

EH Bildu talde politikoa

Grupo político EH Bildu

Ijentea, 1 - 20003 Donostia
Tel. 943481027 eh_bildu@donostia.eus-- www.donostia.ehbildu.eus

- arriskuen azterketa edo datuen babeserako eraginaren ebaluazioa egin dezala, herritarrentzat sor daitekeen kalte mailaren eta lortu nahi den helburuaren arabera; eta udal taldeoi eman diezagula horien emaitzen berri.
2. Donostiako Udaltzako hertsatuki eskatzen dio Udal Gobernuari udal langileekin eta haien ordezkariekin azter dezala, argi eta zehatz, bidezaintzako irudien tratamendua, plataforma hori indarrean jarri aurretik, 3/2018 Lege Organikoaren 89. artikulua agindu bezala.
 3. Donostiako Udaltzako hertsatuki eskatzen dio Udal Gobernuari mahai politiko-tekniko bat eratu dezala bidezaintza plataformaren kudeaketaren eta sistema horrek egingo duen irudien tratamenduaren inguruan aritzeko, alderdi eta ondorio garrantzitsuak baititu herritarren eta udal langileen oinarritzko eskubideei eta askatasunei lotuta.

2023ko urtarrilaren 19an.

Zigor Etxeburua Urbizu
EH BILDU udal taldeko zinegotzia